

IOANNIS FABRICII MONTA- NI POEMATA.

Sylvarum liber vnus.

De consulibus Tigurinis lib. primus.

De Vvilhelmo Thellio Elegia.

CVM EPITHALAMIO IO-
annis Alti Francobergensis.



TIGVRI APVD GESNEROS
fratres.

3

IOANNIS FABRICII
MONTANI SYLVARVM LIBER
unus.

AD CHRISTVM IESVM.

CHRISTE aeterna Dei progenies patris,
O spes, ô animæ certa salus mea:
Sunt quævis Herculeis iungere terminis
Eoos Arabas, & gelidum Scythen,
Est vnus labor: huius si Deus arroget
Terrarum imperium, si mare seruiat,
Angustæ deerit nescio quid rei.

Hunc si militiæ nobilitet labor:
Si Martis decorent currus eburnei, us
Euinctiq; duces luuida brachia:
Illum si foribus prodeat aureis,
Gaudentem strepitu prætereuntium
Si gemma bibat, & murice dormiat,
Dys æquat superis plebs popularium.

Plenis musta cadis viuere parcior
Hæredi properat: si premat horreis
Quicquid diuitibus nascitur insulis,
Peius morte grauem pauperiem timet.

Nos sed CHRISTE tua qui sumus in fide,
Non gazas Arabum, non ebur Indicum,
Supremi petimus materiem mali:
Si præsentia nos & bonitas tua

4 IOANNIS FABRICII
Ditarit, tenui sub lare, pauperes,
Degemus Phrygijs conditionibus.

AD PETRVM LOTICHIVM
secundum, poetam.

Petre quo primum duce sacra Phœbi,
Et nouem vidi latices sororum,
Nos amor quando sociauit ambos
Martis in vrbe.

Quem per obstantes sequiturus alpes,
Et maris cœcos fueram tumultus:
Cur tot inter nos iacet & locorum?
Atq; viarum?

Vltimos nam tu, procul orbe nostro,
Gallia fines habitas remotæ:
Me fouet felix Tigurum, beatos
Inter alumnos.

Forte dum longum furit, & cruentum
Pertinax Bellona quatit flagellum,
Quæris an nostra regione pax, an
Bella morentur.

Otium nobis bona fata præstant:
Alma pax & rura Ceres frequentant:
Præter hunc nostrum reliquis sed omnis
Disidet orbis.

Iam frequens Turcis equitatur Ister:
Thraciæ passim volitant sagittæ:
Audit armorum strepitus Vienna,
Audit equorum.